

## LI TCHIN DO CURÉ.

Dins on bia p'tit viladje au fin fond d' noste Ârdène  
On bon vikant d' curé fieut s' bouye à bon mârchi ;  
Tènowète, i s' plindeûve dès portchès trop tètènes  
À s' môde : « Lès pârwèssyins n' sont nin laudjes aaurci ! »  
Tos lès djoûs au matin, i s' dispêcheut d' dîre mèsse  
Po quate pèlés qui v'nint rin qu' po lî fé plaîji ;  
I n' p'leut mau d' passer s' tims à d'mander qwè èt quèsse  
Po rademint v'nu d'djuner à " l' fortchète ", s'apinse li .  
Si, po l'Adorâcion èt saquants grandès fièsses  
Il aveut dèl bèsogne : riniètî, aprèster,  
On côp ç' dîmègne là yute, i ratrapeut mau s' tièsse :  
Brèvauder, s'embêter, tûzer, toûrnicoter.  
Onk di sès pârwèssyins, qu'aveut sintu l'afaîre,  
N'aveut jamaîs rovî li spot qu'èstant gamin,  
On lî a repèté dès cints côps su l' minme aîr :  
" Tant qu' vos sèroz à ça, li diâle ni v' tenterè nin !"  
I lî apwate on tchin rèlî dins one nitéye  
Qui s' bèle niche lî a d'né là chîs samwin.nes di d'ci ;  
« Fioz-è vosse compagnîye, èt tot l' long dèl djoûrnéye,  
Rin d' mia po passer s' tims, djouwer èt v' ragaîyi. »  
Come d'èfèt, onk come l'ôte, i n'ont nin l'aîr di s' plinde ;  
Quand gn-a onk qui s' mwaîjit, l'ôte mèt s' tièsse su l' costé.  
« Nin co por one bleuwe vatche ! », s' on lî consyîye dè l' vinde ;  
« I n' lî manque qui l' parole ! » s'apinse li brâve curé.  
C'è-st-insi qu'on bia djoû, li grand maurli l'atauche :  
« Monsieû l' curé, choûtez on pau ç' qui dj'a tûzé ;  
Vosse tchin, i mèrite mia qui d' trauyener d' drwète èt d' gauche !  
À Mautche, i-gn-a on' ome què l' pôreut fé causer.  
Vosse Milou èst capâbe, byin pus malin qu'on n' pinse ;  
Cit-ome là qui dj' vos cause a todi stî r'conu  
Po-z-aprinde à tchafyî aus pèroquêts. À l' cinse

Èwou qu' dj'a travayî, c'èst zèls què l' foûrnichenut.  
 Dji wadjereûve mi quinzin.ne qui li, i pârvêreûve  
 À fé causer vosse tchin come on vraî avocat ;  
 I n' fait nin ça po rin, mins mi , ça m' sibarreûve  
 Qu'i l' faureut forpayî, i n' waîte nin si près qu' ça.  
 – Tènoz, là dîs-eûros ! Adon, vos m' vèroz dîre  
 Si l'ome a boune idéye, èt si dj'a yeû raïson ! »  
 One pitite cwade à s' cô, bin oblidiî do sîre :  
 Au cabarèt do cwin, on r'trove tos lès soçons.  
 « Vos n' v'loz nin r'prinde mi tchin ? » di-st-i au camarâde  
 Qu'il ont lampé èchone ; « I m' chone qu'il èst nauji ! »  
 Èt l' maurî, discaurlé, qui porsût s' porminâde,  
 Si ramwin.ne, tot pèneûs, dé l' curé qui transsit :  
 « Èt qué novèle ? I cause ? – I 'nn' î manque pus dès masses !  
 – Comint ça, pus dès masses ? I cause ou i n' cause nin ?  
 – Il a l' dêr di causer ! Il a mâqué one chasse !  
 D'après l'ome, dins yût djoûs, i causerè come one djin.  
 – Mins ça va co coster ? – Non.na, i s' contintereûve  
 Di dîs pèlés-eûros ; – Èco ? Po quî ç' qu'i m' prind ?  
 – Èstoz bon à consyî ? À vosse place, dji payereûve  
 Vèyanmint l' chance d'awè à l' mwin on parèy tchin ! »  
 Au cabarèt do cwin, maurî èt camarâdes  
 Ricaurlés s'ont dauré su lès chopes èt l' pèkèt.  
 Quand l' samwin.ne a stî yute, dji n' vos di nin l' sèrâde :  
 Li transsichaud d' curé va lancî s' côp d' chufflèt.  
 Po s' fé quite di ç' rosse là, l'ome a l' chance dè l' p'lu r'vinde  
 À onk qu'a dècidé d' fé plaîji à s' gamin.  
 Èt l' magot fait passer l' swèleû à tote li binde  
 Di soçons jusqu'à tant qu' tot l' monde a stî mwârt plin.  
 Ç' côp ci, pupont di r'nike, faut cârculer l' maneûve !  
 « Èt qwè, i va causer ? Wou è-st-i, dj' nè l' vwè nin ?  
 – Causer ! Monsieû l' curé ! À l' choûter, on braîreûve !  
 I v' va qwè ça si lon ! – Èt bin, 'l èst d'abôrd timps !  
 – Pus moyin dè l' fé taîre, i vout conter matènes !

On caquèt, one babèye ! Insi, i m'a d'mandé :  
« Èst ç' qui nosse brâve curé coûtche cor avou s' mèskène ? »  
Quand dj'a ètindu ça, d'on lan, djè l'a maqué ! »  
Nosse curé èst sbaré ; pwîs, i sorît, binauje :  
« Vos-avoz bin faît, m' fi ! – Oyi, mins dismètant,  
Li qui valeut dès caurs, qui n'èsteut nin èrnauche,  
C'èst mi què l'a touvé, èt dj' è su-st-au r'pintant !  
Po m' p'lu fé pârdoner, djè l' conterè à tot l' monde  
Qui dj' l'a oyu, vosse tchin, causer, rîre èt tchanter !  
– Là dîs-eûros po v' taîre ! Pace qui, po fini d' compte,  
Si l' Bon Diè l'aureut v'lu, nos l'aurin.n' p'lu chaper! »

Albert Delvaux